

Մարդը նայում է իւզոտ աչքերով: Ոգին պլլում է դիտերին ու մարմինը խորտակում:

Պերան արեւդարձային, պատահաբար հարստացած ծովային քաղաքների անդուսպ համարձակութիւնը չունի: Արեւի կիզիչ ակունների տակ ճգմուած, նա չի մաքառում անկարելի կոկոխէյլների հրդեհհոսումով:

Հարթագունդի վրայ, արդի քաղաքակրթութեան նախի եւ պողպատի ճանապարհներում նա խենդացած աշտարակ չէ: Ոսկիի եւ օդի մէջ բուսած, տեղոտ մի հրէջ, որի ձեռքի մէջ ծածանում է արշաւանքների անողոք դրօշը:

Պերան կազմուած է փոքրիկ բաներից: Նա միջակ է եւ անտանելի, վանքից փախած երիտասարդ վանականի աժան լրբութեան նման:

Շնացած ծերունու լորձունք է: Պոռնկացած Սուսանայի մտերի վրայ դողդղացող ձեռք:

* * *

Կաֆենների մէջ, ժամերով նստած, բթացած դէմքեր ծուլօրէն նայում են, չգիտես ինչ:

Սորը ընկած կուրծքերի վրայ աննշան ազամանդներ:

Նեղլիկ, «մեծ փողոցի», անցորդը առիթ է փնտռում կանգ առնելու եւ, քիթը օդի մէջ տրորելով, սպասելու:

Կինը աժան է: Շպարուած դէմքի վրայ ժպիտը մեծ խորշոմներ է բաց անում: Զիստերը տրորում են ու շրթունքները վայր ընկնում:

Ամէն ինչ բացօրէն ծախու է, բայց առեստուրը փոքրաքանակ է եւ մանր:

Զգացումը սանտիմետրով է չափում՝ վաւաչոտ մատերի մէջ շոյուելով:

Իռները կիսաբաց են՝ անձայն եւ սողոսկող ոտնաքայլերի համար: Խօսում են գլխի եւ յօնքերի շարժումով: Աչքը հինցած ձիթապլտուղի կնճոռտ տեսքն է առնում եւ թուլացած մարմնի իւղերի մէջ լողում:

Գալաթա-Սէրայի դրան մօտ երբեմն կանգ են առնում գլխատած ստուերներ: Նրանց ոչ ոք չի տեսնում: Սակայն, բնազդաբար, ամէն մարդ իր քայլը արագացնում է:

Աւելի վեր, Թաքսիմի մօտերը, փողոցը

չունչ է առնում, բաց է անում իր բազուկները՝ օդի եւ երգ ծախող փայտաչէն սրճարաններին: Ցեխերի մէջ վայր ընկած պատուած կրկնակօշիկի նման մի դուռ: Խմբագրատուն: Աղբ եւ երգիծանք: Այստեղ, եւ դուրսը, ամենաշատ կարդացուած թերթը:

Պոլսում, բոլոր եկեղեցիները պոռնկատրներով են շրջապատուած:

Ճահիճի մէջ միջատները բարձրաթռիչք սեւեռում են եւ ամէն ինչ սոսկալիօրէն բնական է:

Բարեբախտաբար, Սկիւտարը կայ, Վոսֆորը, մեր մարտիրոսները կան:

* * *

Բլուրի վրայ, ձորի շուրջը կանգնած մըռայլ նոճիկների կատարին, փայտաչէն տունը, ուր բնակում եմ, թառել է խաղաղ՝ խոնարհաբար դուրսը ծռած:

Մէկ կողմից՝ փողոցն է, միւս կողմից՝ աստիճաններով իջնող պարտէզը: Պարտէզ, եթէ կարելի է այդպէս անուանել... Վարի, կիսաւեր պատից պատահական բոյսերը մազըլցում են առատ թուփեր կազմելով, բարձրանում են սալորենիի շուրջը. գրկում են տանձնի եւ կանգ առնում շնչասպառ, վաղուց չխնամուած վարդենիի մօտ: Աւելի վեր, անորոշ պտուղի մի ծառ, ու ժանդոտած երկաթէ թելի վրայ, թոքախտաւոր մի որթ, որը չգիտես ինչպէս, կարողանում է իր դոյուլիւնը պաշտպանել, հարեւան հաւերի յարձակումների դէմ: Գրեթէ տան մօտ, կէս փլած, քարեչէն մի աղբիւր՝ հինաւուրց յիշատակների մընացորդ, բայց որի ջրով առատօրէն սնանում են տան, փտած փայտերի վրայ մազըցող բազմաթիւ վարդերը:

Պարտէզի կողմի պատուհանների առջեւ Վոսֆորը մի վայրկեան լճանում է, հեռաւոր երազանք ձեւացնում, դոյնդոյն քարեղէններով զարդարւում, ու կորչում է շրջապատող բլուրների առատ կանանչների մէջ:

Հակառակ կողմից փողոցը, թշուառ, երեսի վրայ ընկած մի անցք, որ եղբրում է այրբուած թաղամասի փլատակները, ժամանակին գեղեցիկ, դրքերով եւ թանկարժէք յիշատակներով լեցուն, տուներ են եղել: Ամէն պատուհանից, պատմում են բնակիչները, դաշնամուրի ձայն էր լսում. վառվառն երիտասարդու-